

《许黄门先生诗集》 （明）许相卿 撰

目录

五七言古

五言律诗

七言律诗

五言绝句

七言绝句

六言

五言排律

○五七言古

山行

早春入山詹仲携酒野酌笑咏成诗

古意

诸弟夜集

和答沈紫硖

次韵西邨老人见寄

懒习

秋晚

古意

简南涧上人

云岩大风

有感

山中吟和从弟舟仲

南城楼集

山行

小窻睡新足，起视时何其。落日余山椒，树颠红陆离。快哉情景新，一散顽腰肢。登登悄谁与，瘦影自崛奇。莺花非故妍，泉石含新姿。关河怯回首，直北多军麾。封侯一剑任，谁当请丸泥。祗恐廊庙忧，不在潢池儿。熏风低草树，戟髯不受吹。徒倚苍石根，忧端与山齐。

早春入山詹仲携酒野酌笑咏成诗

仲氏有幽兴，访我春山中。冰霜策老马，觴豆驱孱童。烟云满怀里，荆复尘土容。空谷喜足音，虞乐况天衷。寒潮俯东岫，晴暄负南荣。酌言永今日，咏归聊短筇。

### 古意

新月生西岭，明河低远林。坐见大火中，秋序忽已侵。感叹老将至，裴回劳我心。劳心复谁语，抚弄东厢琴。调高曲未竟，寡和难为音。矫首文江子，何时宣此襟。

### 诸弟夜集

献岁闋霖潦，今夕欣澄𩚑。况我远游归，兄弟会匪它。晏晏言笑洽，楚楚壶尊罗。东风举衣袂，明月在庭柯。一觴再三咏，舞影时婆娑。荏苒百年内，白日去如波。载怀秉燁贤，不乐如夜何。

### 和答沈紫硤

我本山泽癯，结庐白云岑。岂独远尘土，风雨亦俯临。朝阳读吾书，卒业羣壑阴。赤手莫援世，敢云长往心。江山入扞虱，形神调戏禽。新暑不到窻，空庭梧十寻。故人遥相忆，因风遗好音。硤上有初约，莫辞山路深。

### 次韵西邨老人见寄

眇予媿谐俗，衡门日重关。木榻已漆敝，草屋多苔斑。缅怀结发期，抗志夷惠班。乘时冀陈力，翊世姚姒间。驰兪忽晷晚，惊波逝潺湲。悠悠违夙心，戚戚长苦颜。百年贵适意，青阳宁复还。明月皎东林，流烟澹前山。潜居勸明德，哲人犹可攀。

### 懒习

卧痾岁强半，懒习乃成性。巾屨不时御，散发还高咏。避世迹尽扫，怀古心独竞。经旬未下堂，花鸟苦相迎。登山俯周行，吾道终铮铮。

### 秋晚

晨兪动林薄，水竹尚清佳。寒日射水中，万竹走龙蛇。美人秋云东，相望眇天涯。招招踏澄江，来把芙蓉花。

### 古意

朱夏忽云谢，西原凜秋色。流兪惊电驶，我心悚以恻。生也信有涯，漆园真达识。势利夸毗子，去道远已极。优哉复优哉，冥心任通塞。

### 简南涧上人

我本山泽癯，夫脚声华路。翻然亟来归，逢此南涧渡。问讯云中庐，树石清犹故。悠悠卒岁途，相随入烟雾。

### 云岩大风

寒风西北来，千林号动地。败叶舞长空，万态助声势。老树冻欲僵，颠崖偃如避。怀哉失哺儿，凄凉更谁恃。残炉拨不温，背壁各掩涕。病怀转增恶，感叹成坐起。羊裘御复却，芦花耿予意。相望天一涯，羽翼难远庇。夕阳自推窻，题诗志吾媿。

## 有感

西日不停驭，东流无回波。良会今不载，志士嗟如何。忆初儿戏时，盈耳明良歌。童子亦何佑，奋庸图不磨。行行未登歧，勋华倏以徂。妖氛蔽天宇，林羽无宁柯。叹息不能寐，穷景谁挥戈。平生本朝心，翻然寄烟蓑。为语同心友，盟我云山何。

## 山中吟和从弟舟仲

懒我糟粕等万卷，儿戏已羞论白战。要令心地收汗马，一念斯须圣狂变。雨声铎晕悄空廊，风味与君曾共尝。我独遥从万里役，强颜翩翩侣随阳。简书于归旧林壑，无奈杞人怀更恶。晴空扬袂北望心，满眼风尘障寥廓。平生知己许青山，身世商略支颐间。谷风习习云卧熟，野日荒荒天步艰。东南片月出海白，乌乌悲歌满中泽。山人徙倚岸角巾，独和商声扣岩石。栖迟聊欲全吾真，夷尹异趣归同仁。雅怀准拟烟云老，无力挽回天地春。洙泗行藏一二数，善矣渊濠学尼父。一义战克千乘轻，安事乡人荣负弩。湖山佳绝真画图，芒屨走挟苍藤枝。天游到处有濠上，荒哉一舸逃姑苏。虚室灵光尚还照，凝神混沌甘无窍。技儿役役矜擅场，那堪着眼供一笑。

## 南城楼集

坐瞰重溟八千尺，怅望蓬丘桃已核。飘飘直欲凌紫烟，何物虚名论赫奕。指挥如意按悲歌，徙倚女墙扶瘦腋。咄哉世事覆更翻，老矣夕郎玄尚白。习池岘首今蒿莱，转眼滋游雪鸿迹。林■〈垂夬〉长虹浙河暝，鸟外残阳越山夕。童冠熏风笑咏归，三年病怀聊一适。抓髯清啸动海坝，豪宕从来曾此客。

## ○五言律诗

晚晴

暝色

霁色

江上

秋热

久雨

乡思

阻风和顾省长

夜坐

又八月望夜玉带湖泛月

送蔡天锡

夜过前峰僧舍

云行和邓士鲁  
宿石门山房  
瓶山  
赠何山人  
章广文夜至  
夕泛有怀  
睡起  
大雪携鹤观瀑  
晚晴  
再游苏皋祠  
晏起  
元日  
试杖  
周氏别业  
董纯卿至  
籊儿庙  
南楼  
西湖迟徐郎不至独往林处士墓  
渐翁夜过山中  
和咏钱东畬见怀  
张横浦读书台旧题次韵  
越人诗谒次韵  
或诵施西亭暮春之句凄然感怀追武其韵  
两翁来会前峰精舍  
春雨卧病朱陈两翁至  
夏日雨后  
庐山  
夏日重游云岩寺  
董化卿尹宜兴  
云涛庄雪夜  
山庄暮归  
元日  
客诗问疾次韵  
次韵范栗斋读徐苏传

暮春雨后至孟家瀑

送叶陈州

废社

秦溪野泊迟朱陈两翁

挽周文弼

哭内

晚晴

苦雨连旬日，初晴一振衣。残云依海峤，新水到柴扉。僻性嫌山浅，尘缘与世微。斜阳疏树里，清影石边归。

暝色

暝色狭斜路，幽怀长短吟。残虹犹薄海，高鸟渐依林。去住从吾道，艰虞热壮心。燕云愁直北，望断欲沾襟。

霁色

霁色林庐晚，愁吟野水湾。断云虹外雨，残日鸟边山。海宇堪流涕，朝班祗强颜。独嗟身世拙，早见鬓毛斑。

江上

天堑东南限，神功混沌余。波涛来楚蜀，云雨被扬徐。旅泊水村寺，霸图烟叶墟。亲庭渺何许，倚望独踟躇。

秋热

秋空骄剩暑，客舍困炎曦。檐鼠时呈技，渊龙或守雌。山云督眼度，江月近人宜。跌坐晚风榻，焚香了化机。

久雨

兀兀凭谁语，悠悠祗独栖。雨深山更静，溪涨岼全低。日月书生老，风尘世路迷。新晴散孤闷，邨酒正堪携。

乡思

□极南云迥，时惊北候新。栩然青琐梦，尚尔白纶巾。恐负平生学，常怀寂寞滨。潞河秋水永，何处是归津。

阻风和顾省长

病涉频占易，狂移欲讼风。闲杯拈又阁，归梦应还空。客讶江声怒，神矜噫气雄。南来何郡子，督尔过飞蓬。

夜坐

独坐忧思集，悲歌夜色辽。疏林明远火，静院急寒潮。戎垒江南遍，天阍冀北遥。秋空穿病眼，何日遣嫖姚。

又八月望夜玉带湖泛月

良夜不可负，归人还自留。天闲多病客，月占两中秋。远水疑通汉，轻风稳送舟。露华清到骨，寒意问羊裘。

送蔡天锡

乡国来何晚，风尘别更难。天空落木外，路迥朔云端。意气时看剑，悲歌几控鞍。春风消息好，为报浙河干。

夜过前峰僧舍

病客迷津舫，清宵古寺门。灯明深树阁，僧住远人村。烟月自良夜，江湖多放言。云泉有旧约，投老欲终焉。

云行和邓士鲁

云意已弥望，马蹄还复行。归心先鴈远，病眼独山明。落落同尘迹，悠悠和古声。撩人奈佳句，孤烛守寒更。

宿石门山房

尘土三年梦，云林胜日游。小招聊拟赋，多难独凭楼。月色千山午，江光满意秋。心期应共汝，投老白苹州。

瓶山

小筑不远市，高情还傍山。尘缘瓮天外，风味曲生间。瓦枕乾坤梦，簪冠烟雾颜。因君怀旧隐，海上紫云湾。

赠何山人

爱酒何山子，经年事远游。云烟几两屐，湖海一扁舟。白眼无遗胜，青囊有秘搜。更休谈望气，那复问封侯。

章广文夜至

孙烛十年别，清尊今夕同。宦游谈五五，衰病闷忡忡。税驾逢身健，移家得岁丰。浮生能几会，搔首叹萍蓬。

夕泛有怀

幽意忽有属，噉尊上小舫。乾坤新化理，湖海渺逋逃。水混秋空远，山留夕景高。平生携手好，岁晚隔风涛。

睡起

假寐凭残易，瞢腾过晚钟。□旋秋气肃，山应岁占丰。潜跃从吾道，暄凉自候虫。腐儒经世业，多病已成翁。

大雪携鹤观瀑

初雪压高帽，羸骖扬远鞭。玉龙僵不起，白鹤舞争妍。山僻地无主，骨清吾欲仙。长吟杂孤唳，归路晚翩翩。

晚晴

岁晏田家隙，晚晴山日温。幽人神独往，古意俗谁论。陈迹云霄路，闲身造化恩。风檐高士傅，旷代有知言。

### 再游苏皋祠

路忆秋风旧，时逢灯事残。林深天忽暝，春浅午犹寒。画壁蛛丝嫋，苔碑鸟篆剗。自怜踪迹野，到处得盘桓。

### 晏起

晏起曝衡宇，初春风物幽。晴峦澄野旭，融雪涨寒流。谢俗饱闲味，逃名疏贵游。仙人渺何许，吾亦擅丹丘。

### 元日

云邹又元日，春意亦闲门。国事支颐笏，年光落手尊。客携僧入社，邻贺鹤生孙。邈矣孤山老，神交百世论。

### 试杖

雪径初扶杖，江城欲罢灯。书门全谢客，行药偶逢僧。候鴈将辞泽，游儵已负冰。湖山春意动，游兴日骞腾。

### 周氏别业

周郎结屋处，风物画中论。晏坐泉围榻，昏钟斗挂门。山光明遶屋，海气迴埋村。望望吾庐近，时来共一尊。

### 董纯卿至

我惭杨子宅，君棹问奇舟。今古谈能剧，高闲意自投。春禽从聒聒，道况只悠悠。相望牛鸣地，过从信去留。

### 簏儿庙

霁色秋移舫，晴云午过坛。广川浮野动，深樾到门寒。麟阁心空在，鹤枝迹已安。高谈入挥口，返棹见归翰。

### 南楼

幽兴属遐眺，凭高散余醺。徘徊出海日，邂逅还山云。度鸟江天永，断峰吴越分。超然俯清旷，何处有尘氛。

### 西湖迟徐郎不至独往林处士墓

胜会应空负，幽怀亦自聊。舟移六桥永，衣振两峰高。箫鼓春游竞，鸢鱼野兴豪。孤山有冥契，独往麴溪毛。

### 渐翁夜过山中

寒夜平生友，星江百里船。风烟犹远色，虹月更新妍。十载话通昔，一真思入玄。分携秋水岸，怅咏白云篇。

### 和咏钱东畚见怀

夫君敦夙好，诗寄紫云深。况值萧条候，应知迟暮心。风神传落月，声律

谱鸣琴。江湖渺延伫，山寒增夕阴。

张横浦读书台旧题次韵

古台全草没，闲户半云扃。往哲犹生气，狂夫欲乞灵。蜗书阴藓碧，鸟破晚烟青。高节存遗传，闲来续旧铭。

越人诗谒次韵

避俗云邨远，经秋客鬓新。寒灯闲自喜，残卷阁还亲。往事悲歌永，西风酒力淳。明朝山雨歇，曳屐访天绅。

或诵施西亭暮春之句凄然感怀追武其韵

石磴闲高眺，溪乡豁俯临。晴峦多爽气，春事已繁阴。潮带虹边雨，云连鸟外林。美人遗妙语，惆怅细悲吟。

两翁来会前峰精舍

一别岁云改，多病会常难。天值清和景，人来野水干。庭空藉芳草，林

■〈垂夬〉认谣峦。跌坐谈方外，吾生得大观。

春雨卧病朱陈两翁至

山雨连村暗，兰舟二仲来。过逢老多阻，愁痛郁初开。绿树春将谢，红尘梦久回。高秋苏病骨，还约共登台。

夏日雨后

村庄住山麓，长薄带清川。荷锄通新水，携壶饷远田。鸠声时乱聒，龙骨晚高悬。好雨连宵永，家家同晏眠。

又

返照收残雨，幽怀步广川。对山哦得句，坐树课畦田。岭■〈垂夬〉江光迥，林疏日脚悬。前村晚归牧，丰草散牛眠。

庐山

斜日匡庐道，生绡水墨图。胜难长句写，深称列仙都。云失开先寺，天连彭蠡湖。遥闻栗里近，惭愧拥车徒。

夏日重游云岩寺

老去胜怀在，重过支遁房。乱藤富午暝，深涧袭秋凉。客路逢蒲节，僧窗酌桂浆。烟墟莽吴苑，残照醉歌长。

董化卿尹宜兴

木落岁云暮，楼船发广川。春浓阳羨茗，化接武城弦。云表鹏程迥，江滨鹭社便。善权岩洞好，慰我远游篇。

云涛庄雪夜

江邨堪老我，寒夜更宜诗。缟屿归禽讶，玄机厚蛰知。冰潭清数石，雪路漫多岐。若个孤山宅，逋翁得擅奇。

山庄暮归

笋舆残梦后，松径夕阳时。天倒晚湖湛，霞横秋嶂奇。布袍露半湿，斗笠风全欹。童子迎山麓，灯光度槿篱。

元日

纪历初更岁，冰霜未放春。年华东去水，世事后来薪。海宇风尘满，鸥鳧保社新。壮图难着手，宽计作闲人。

客诗问疾次韵

习懒仍兼病，岩扉日日关。心神犹紫禁，嗅味奈青山。世意同云薄，松阴伴鹤闲。楼头孤嶂近，时得尽危攀。

次韵范栗斋读徐苏传

高人同厄运，龙卧得身存。矻矻赁春日，劳劳抱瓮园。野夫惟胜韵，幽思寄清尊。惆望堪谁语，思君仵石根。

暮春雨后至孟家瀑

空林宿雨歇，近郭曙钟寒。乱水斜吞径，残云弱傍滩。泉声人语细，山气客裘单。老我足幽胜，后谁应感叹。

送叶陈州

柳外鸣班马，城东趣去辕。遥闻经贼郡，重致爱民言。晓色明文綬，熏风进醪尊。宛丘多隐逸，君试访衡门。

废社

高秋风烟佳，兴到喜独往。霜林矜春红，废宇漫古榜。丰畦禾纵横，瘴海劫苍莽。长松多逢人，邂逅幸我恍。

秦溪野泊迟朱陈两翁

孤舟泊已暮，二老来何迟。深树共寒意，东流渺风漪。闲闲僧话续，悄悄客怀羸。返照长霞外，容辉宛拄斯。

挽周文弼

功名大槐梦，冠剑一杯封。清白高标在，豪华此路同。愁云迷断鴈，衰草泣寒蛩。一掬斯文泪，飘随宰相风。

哭内

束口良孀婉，半途长别离。浮生忽梦破，浪迹尚尘縻。寒杼遗残织，空巢守伏雌。總帷风雨夜，怕诵痰彦诗。

又

偕老旧盟废，半生清影单。浮名吾独累，分谤子能贤。泪咽垂髫女，吞声执手言。间关句曲路，忆着便潜然。

○七言律诗

客夜  
下第秋夕过通济桥  
江泊寄金山僧  
彭城  
乡思  
赵邨夜泊  
澈墅莫归  
卧病  
独往  
五亩山集用杜韵  
怀玉驿  
黄鹤楼  
多病  
春日泛湖望海  
雨夜客至  
高卧  
石门西邨勾溪至  
徐襄阳过访草堂  
玄览亭小坐怀白鹤山人  
次韵锺西皋雨中述怀  
应容庵书至使者贄诗私覲病中和答  
刘海村诗问次韵  
入春避地澈水秋尽还山西皋诗慰次韵  
山游  
有感  
谢别沉默斋  
再别吕东汇  
春暮怀王鹤山  
次韵苏叔豹见忆  
雨宿真如寺  
初春海上  
夜坐  
秋晚溪上  
九日

寓萧寺

夜客对雨

麦山老人

赵渐翁七秩初度有诗次韵奉寿

祝思允宅夜宴

和答锺西皋

和答徐光泽

和答锺西皋

中秋夜湖舟对月

次韵溪翁春日天宁寺楼

西村诗贺堂成次韵

次韵锺西皋见忆

送友

南楼

秋晚登山

西皋先生季夏诗来俯慰寥沅仆病倦秋半差强展咏三复次谢兼简西邨勾溪二

翁

送徐郎进士举

晚眺

有怀

客夜

敝裘十载风烟客，落木满郊灯火村。吴岫白云家远近，瓦瓶浊酒自寒温。  
山灵有约惭移檄，世路多歧欲断魂。惆怅岁华今向晚，□衾豪思欲腾骞。

下第秋夕过通济桥

雨过都门秋意多，凭阑慷慨酒微酡。壮怀端与长汪誓，伟事犹闻故老歌。  
清禁楼台涵月迥，九衢灯火□星罗。江东留滞表年晚，顾影沧波奈尔何。

江泊寄金山僧

曾忆高楼紫翠间，孤舟今夜隔沙湾。诗留吞海谁应护，名刻朝阳石未刊。  
三度长裾空禁掖，百年清梦此江山。驱驰尚冷东冈约，不待移文已厚颜。

彭城

萍踪今日又彭城，寒吹萧萧舞敝纓。汴泗蛟鼉争险壮，濠梁烟月递昏明。  
东风苑陌春襟动，午夜星河剑气横。旷代独怜陈正字，心期应不负平生。

乡思

乡梦初残晓禁钟，客怀无那转忡忡。丹心许国有如日，病骨未秋先怯风。

空谷移文它怨鹤，长云搔首羨冥鸿。封章欲乞闲身去，九杞泉头理钓筒。

### 赵邨夜泊

经岁重来旧游路，荒郊残日下高梧。千艘灯火河成市，五夜殷忧病独癯。  
新月随人书屋近，冻云回首玉楼孤。腐儒通籍惭何补，自合归山理芋区。

### 澈墅莫归

残日东风澈墅回，轻雷挟雨马头催。青山有约羈尘网，四海多虞负酒杯。  
寂寂野芳春事晚，茫茫天运杞人哀。灯前试拾新诗草，强半忧吟取次裁。

### 卧病

长夏寒毡拥病魔，卷帘疏雨动高歌。紉纆末俗矜儿剧，□兀孤怀倚太阿。  
榻上光阴诗草乱，山中筹算药炉多。新晴拟散顽腰脚，游兴翩翩绕薜萝。

### 独往

兴到海滨成独往，千林风日净娟娟。寒山病骨晚争瘦，白鹭苍波秋可怜。  
天地闲愁尘梦醒，烟霞胜事草堂偏。斜阳深径渔樵尽，弄影萧萧石上泉。

### 五亩山集用杜韵

桂树青青赋小山，栖迟我亦数公间。鸥鳧野水寻初约，虎豹秋风拥九关。  
采药云林聊寄迹，请缨天阙尚强颜。王孙一饭终身意，况复虚名国士班。

### 怀玉驿

十载黄埃走病身，凭茵惊见万嶙峋。远人鸟语有真意，过雨风光如莫春。  
白日此心宁宦达，青山与我故情亲。云涛旧业应无恙，猿鹤时来见梦频。

### 黄鹤楼

楼台仙迹古城隅，尊俎英僚胜会初。全楚雄图归指顾，清湘幽愤入踟躇。  
江光蜿蜒晴虹迥，沙渚娟娟野日虚。客子自多云水意，扁舟却羨洞庭渔。

### 又

一雨江城五月凉，重楼危槛俯苍茫。烟芜七泽浮元气，晴树千村动夕阳。  
竞挽龙舟怀正则，遥思彩扇出明光。高堂此日还蒲艾，游子尊前忆故乡。

### 多病

多病倦游聊作计，负山临壑结茆堂。钓竿入手江湖远，书卷蒙头日月长。  
春服初乘沂水兴，什风时度药畦香。漫劳过客谈经济，习懒年来乐睡乡。

### 春日泛湖望海

雨阁替云迟客游，荻滩桃浪信轻舟。病身祇合伴孤鹤，健语犹能回万牛。  
陇树阴成悲宿土，烟芜影断见浮丘。沙棠拟续招寻兴，更泛蓬莱清浅流。

### 雨夜客至

曲已团蒲午梦残，鹤声报客小桥湾。翠屏寒映万银竹，绛蜡秋酣两玉山。  
道意自惭违俗累，酒船真负问奇还。紫萸黄菊重阳近，突兀星厓拟再攀。

## 高卧

病夫高卧星厓上，野情幽事静相宜。晚山如揖抗尘表，晴云有时来坐隅。  
闲身日月衣裳懒，胜地禽鱼造化私。汗青尚论百世士，栗里苏门我得师。

## 石门西邨勾溪至

野人沦放紫云谷，胜友连翩根竺村。古渡晚寒初舣棹，万峰秋静独开门。  
历探幽壑寻三秀，深话清镫卧两尊。不厌山家淡风物，还来茆屋负朝暄。

## 徐襄阳过访草堂

野情于世自嵎鹏，一壑蓬蒿手自营。昭旷观游心独领，狭斜歧路梦还惊。  
柴门反锁封秋苏，画舫深维探晚英。满意对床泉石话，三年今得此怀倾。

## 玄览亭小坐怀白鹤山人

远寺疏钟送夕阳，危阑独凭于歌长。高鸿望迥暮天碧，野蝶愁牵霜叶黄。  
对影作双真自爱，百年强半尚须忙。深踪懒性过从断，犹忆清吃旧楚狂。

## 次韵锺西皋雨中述怀

苦雨经旬淹淑景，早雷十日验余寒。庭梅寂寂帘前落，湖草青青镜里看。  
深谷莺花口冷淡，浮家云水尚盘桓。殷忧无那堪谁话，搔首斜阳独倚阑。

## 应容庵书至使者贄诗私覲病中和答

寒林斜日动柴门，一舸遥遥入海村。七字通名孤解后，尺书欹枕得温存。  
京华消息关心远，野戍风烟望眼昏。万里江湖分终老，平生赠处欲重论。

## 刘海村诗问次韵

感叹壶头念少游，危踪到处浪淹留。青山食力荒三径，白首携家访十洲。  
夏半梅黄怜节物，雨深苔翠上衣裘。四郊战骨萦芳草，斜日孤城怯凭楼。

## 入春避地澈水秋尽还山西皋诗慰次韵

寄迹荒城似谪居，还家病骨恋篋舆。山棋雨翠秋容净，林■〈垂夬〉霜红  
野眺舒。忧国多虞怀耿耿，信天定分意如如。独怜万卷成焦土，遗恨连艘失载书。

## 山游

杞山秋高风日好，独扶藜杖步晴冈。达观浮世身如寄，任狭当年气已降。  
云水茫茫去鸟没，烟霞隐隐归樵双。清林孤眺坐成晚，遥见疏林明夜缸。

## 有感

欲向西风酹一尊，乾坤何处着英魂。百年事过风前烛，千古名传海上村。  
香火半龕谁地主，孙枝一叶是君恩。夕阳满地伤心泪，付与江流自吐吞。

## 谢别沉默斋

僦居残夏入高秋，世难存身迹漫投。瘦骨棱层刊坐榻，故乡艰阻赋登楼。  
山中猿鹤多归梦，天末风烟倍客愁。万类两间同逆旅，远游还问武陵舟。

### 再别吕东汇

涉历危途次水村，支离病骨傍人门。满林风叶秋声碎，四壁寒蛩夜语繁。  
客况春温怀地主，邻家社会忆乡园。卜携便觉情无限，回首霜空欲断魂。

### 春暮怀王鹤山

三月风光今又暮，四郊雨意喜全收。春愁无那凭桑落，午梦将成破栗留。  
乡国创夷谁侧席，故人丰采独登楼。空林暮色增惆怅，何日东冈续旧游。

### 次韵苏叔豹见忆

诗句远投多病客，野心无那不羁■〈彳 员〉。秋来旷度□萦梦，老去端居  
独寤言。困鹤风云羞短翮，蹲鸱伏腊饱荒园。剡舟迟尔维星石，起我高谈雪浪  
翻。

### 雨宿真如寺

夜雨僧斋滞客舆，清灯高榻信吾庐。玄谈种种浮生名，茗碗深深坐醉余。  
云路造天无款段，野情随地有华胥。廿年回首红尘梦，寒影空堂自爱予。

### 初春海上

积雨晨收好风日，瘦藤危屐试春袍。山中日月人空老，海上烟云兴独豪。  
隐约野芳初乱眼，郁纡幽思欲挥毫。咏归樵径者谁子，徙倚残阳首重搔。

### 夜坐

开门见月来松径，扫地移床傍石渠。寂历寒蛩共清夜，咄嗟浮世托籛庐。  
黄虞道在生何后，沟壑盟寻老只初。一咏一觞还自笑，明时野调独迂疏。

### 秋晚溪上

坐占清溪瘦石双，风流想象鹿门庞。高歌草泽时空晏，卑睨云台气已降。  
老去闲愁消短楫，醉来佳句堕寒江。归舆伊轧松堂晚，零乱残阳上半窗。

### 九日

感时今日重阳节，扶病云邨第一峰。黄菊深杯桑落酒，青出高帽日斜风。  
道违末俗空孤愤，诗与秋涛合并雄。忽忆苏门遥怅望，欲家辽海谢过逢。

### 寓萧寺

□客闲情与世疏，息肩聊得借僧居。梦残午枕莺声里，诗满桥亭野色初。  
经济有怀犹浪迹，乾坤到处是吾庐。十年世路尘劳障，来谒禅关得起予。

### 夜客对雨

风雨茆堂入夜寒，一尊相对共清欢。盟深鱼鸟便林壑，病中烟岚痼肺肝。  
孤烛话残衣袖薄，小山赋就茗瓯宽。老怀时事频惊慨，意气相逢引剑看。

### 麦山老人

麦翁清时甘陆沈，踪迹迢迢烟雾深。石转醉眠月皎皎，松围晏坐秋阴阴。  
闲携只影云随屐，几见行人雪满簪。朝市语闻应洗耳，登高为赋考盘吟。

赵渐翁七秩初度有诗次韵奉寿

忆昔天门曙色开，连翩并马直庐回。高翰徼外清风播，遐寿壶中紫气来。  
别圃序芳观物兴，平槎对景擅场才。村翁许入香山社，雅祝还称北海杯。

祝思允宅夜宴

残阳隐地红炯炯，角巾弄影青离离。暝烟散空归鸟下，白露被野寒虫悲。  
剧谈杂出觞政乱，佳句欲吐灯花知。野人夙抱杞狂疾，假日偷欢同鸚鵡。

和答鍾西皋

闵雨长歌云汉什，得秋剩有大田风。新凉病骨逡巡健，野水渔舟远近通。  
清梦有征多胜事，旧题无处不尘笼。扶携拟踏西皋路，共采芙蓉带路丛。

和答徐光泽

一缄三月紫云湾，深迹栖迟鹿豕间。兆喜灯花符昔夜，擅场诗句破衰颜。  
病身遥谢金闺籍，草坐常从野老班。自爱山村凉意早，溪南枫叶未秋丹。

和答鍾西皋

一声秋信叶边闻，早见西风度朔云。尘镜红颜吾丧我，雪舟清兴客怀君。  
壶头阅世时何晚，谷口耕岩日自曛。扶手知言千载上，苏门长啸有遗文。

中秋夜湖舟对月

一年好月是中秋，向夕呼舟抱病游。大地清辉翻白昼，良宵幽兴属沧洲。  
湖山夜色孤篷远，天水寒光两镜浮。酣坐不知吟啸永，阑干北斗挂峰头。

次韵溪翁春日天宁寺楼

阑干徙倚雪晴初，十日东风百草苏。全晋夕烽清塞徼，片帆春兴满江湖。  
漫堤新水鸥前永，过雨遥岑鴈外孤。千里河山闲放目，壮游曾忆赋三都。

西村诗贺堂成次韵

少筑岩居俯钓台，更亭绝巘望天台。入春穷谷还桃李，避地闲门自草莱。  
叩石适歌凉月上，卷帘沧海暮潮回。多情张老斯干颂，匝屋烟云为尔开。

次韵鍾西皋见忆

落木残阳独倚楼，归云寒拥晚山稠。烟霏好语传双鲤，湖海闲身擅一丘。  
塞北戎心骄未格，江南民病愧先忧。孤灯长剑空三叹，衰鬓繁霜奈九秋。

送友

棘寺高材起陆沈，翩翩白马向枫林。歌声相续山村静，别意无端江水深。  
千里霜威生画戟，孤城秋色上瑶琴。病夫怅望留无计，寒月荒郊后夜心。

南楼

清吃独上山楼晚，黄落空悲海国秋。遯世野情从弃置，安巢归翼自嚶啾。  
勋名梦断图烟阁，病力时看理钓舟。岁晏阴晴苦难料，竹椽桑土漫绸缪。

秋晚登山

衰病深邨过客稀，经秋短布一衫衣。日边巧宦名争显，泽畔幽人见独非。  
薄暮云屏空翠重，疏林霜沛熟红肥。山头抱犊归来晚，历乱残阳满磻扉。

西皋先生季夏诗来俯慰寥沅仆病倦秋半差强展咏三复次谢兼简西邨勾溪二翁

怀人诗句绿阴暮，抱膝怡情红树村。木榻渐移当荫石，角巾时倚傍溪门。  
松阴晴景湖天迥，沙碛秋光海气吞。白发青山老佑己，裴回唼弄入黄昏。

送徐郎进士举

马蹄特特赴春风，如砥周行万里同。空谷离怀悲冀越，曲江豪思薄云虹。  
褐袍引对螭坳近，鸦墨书题鴈塔雄。野老若为长路赠，赠君椽笔撼玲珑。

晚眺

羣卉随风已作尘，游丝无力可留春。文章今日谁知己，气味兹山是故人。  
虹外晚天青霭■〈雨上对下〉，鸟边烟岫翠嶙峋。悟空寺后荆湖曲，投老千金合买邻。

有怀

岁晚空山独拄颐，扁舟载酒愜幽期。风云怀抱崎岖路，泉石交游梦寐思。  
寄兴酒卮聊把手，缚人诗律几颦眉。一镫相对高斋下，遮莫西林月落时。

○五言绝句

晚度

春雨

节妇

江船

领客观瀑

晚度

压水云欲堕，吞江虹未收。野人聊自适，吹邃满沧洲。

春雨

霖霖林皋暗，低迷草树平。春膏浹南野，吾欲偶邻耕。

节妇

士有不夺志，今见闺中英。一天戴白发，只影没青灯。

江船

水禽戏澄碧，风竹弄清妍。被褐江船客，穷年守太玄。

领客观瀑

我履解赠尔，云中听泉去。归来还履我，怕落风尘路。

○七言绝句

奉饯季父之永州倅依韵

山阁

春病

秋晚

勾溪和什来再用原韵

金山吞海亭

归梦

归期

沈公桥

凭几

扇画赠丰厓

题画寄梁仲

震泽归寄前峰僧

月林僧舍

金粟兰若

望云

徐南塘惠借袁海叟集附谢

赋秋泉

南桥

复陈勾溪

春雨卧病朱陈两翁至

除夕

鲁山

次韵西皋感事

野泊

湖外郊行

一竹

悼鹤

和钱海石给舍韵

招朱怀泮

泊巨野

诗成

闻翁七袞

梦储

奉饯季父之永州倅依韵

残日远峰明陆离，别情惆怅风前杯。竹林今古清风在，猿鹤东山首重回。

山阁

衫浥岚光先雨润，树酣江气未秋丹。飞流千尺凭阑外，并作萧萧六月寒。

春病

山日冥蒙笼野烟，碧桃红杏鬪春妍。老夫独负看花约，布被蒙头白昼眠。

秋晚

远浦长霞弄晚晴，钓丝摇扬拂沧瀛。幽怀自适无谁语，寒日秋波尽意明。

勾溪和什来再用原韵

梦断纷华几岁年，烟云况味只萧然。草玄笔砚消长昼，今雨都忘旧雨船。

金山吞海亭

江面峰头巧着亭，澄波玉宇两争清。倚阑客子心如水，何事沙鸥亦浪惊。

归梦

故山秋老亲闱冷，游子夜长归梦多。独倚苍茫动幽兴，却惭容易脱渔蓑。

归期

归期屈指已无多，木叶萧萧笠泽波。只尺三高英爽在，笑依怀檝又经过。

沈公桥

两涯寒碧成周道，千尺晴虹跨水云。别浦归人多怅望，斜阳搔首剧思君。

凭几

海宇浮云几去来，山邨佳处独裴回。春光已谢还秋信，天只峰头梦未回。

扇画赠丰厓

远路归来已白头，丰厓犹似旧时秋。长藤短褐行吟处，不道山翁是故侯。

题画寄梁仲

海上春山渺莽中，长藤到处识髯翁。贵游无数花间骑，万态风光适意同。

震泽归寄前峰僧

千里烟波一日程，胜游犹恨欠山僧。夜归剧忆前峰翠，晓起阑干试一凭。

月林僧舍

月午天霜破衲寒，梵音萧飒度林端。经残香烬秋寥泐，时有风枝语夜阑。

金粟兰若

野老山僧意味真，瘦筇高笠往来频。十年着我东林社，更道何曾见一人。

望云

郊原新绿正丰茸，晏起钩帘晓雾空。造化无边生意浹，春云弥望湿东风。

徐南塘惠借袁海叟集附谢

柳风桃日满林庐，湘帙緘开午梦余。诗律沿唐追晋魏，一编落手得权舆。

#### 赋秋泉

微霜昨夜下庭柯，东岫朝来爽气多。偶过溪桥探三秀，惊看白发昭沧波。

#### 南桥

一曲溪流两岸松，石梁蜿蜒卧晴虹。矜矜拄杖归来晚，月挂东林屋上峰。

#### 复陈勾溪

此地重来已十年，林庐水槛故依然。过门不是忘相见，刚有东风送客船。

#### 春雨卧病朱陈两翁至

一丘高卧闲云共，二老相过旧雨同。续续江湖十年话，支离病骨起春风。

#### 除夕

一年将尽此黄昏，坐拨残炉火尚温。六十来人今晓事，春风一夜到柴门。

#### 鲁山

周行辙迹几经年，故国青山梦寐牵。桑梓阴阴丘首地，乡云烂烂帝乡边。

#### 次韵西皋感事

野人无意卜潜虚，眉宇闲愁久破除。白发青山随拄杖，残骸应是乞来余。

#### 二

十日开门风叶多，病怀今已入无何。嗟卑叹老真痴绝，昨见黄童发又皤。

#### 三

尧年九歉今始收，满车■〈禾罢〉稴胜封侯。葛巾漉得新缸面，客过山前底死留。

#### 四

不问金华旧牧羊，屋头丹井半苔荒。凌云赋就多仙意，笑托山灵酬一觞。

#### 野泊

沧江茫茫白鸟度，丹崖冉冉晴云流。舟横野渡倚残照，日短风烟生暮愁。

#### 湖外郊行

青鞵短策湖云东，漫搽妙语酬春工。野烟漠漠吞江树，晴雨丝丝织晚空。

#### 一竹

薇蕨声沈旧业空，首阳何处访高踪。冰霜大地同摇落，挺立孙枝殿朔风。

#### 悼鹤

朔风残雪满云邨，一诀仙姿欲断魂。拨尽寒炉梦耶否，夜深明月懒开门。

#### 和钱海石给舍韵

诗酒留连到病翁，绿波芳草暮云东。夕阳归去酡颜色，赢得篮舆两袂风。

#### 招朱怀泮

山光翳翳日沈雾，风色萧萧人倚门。听得寒空叫羣鴈，欲寻之子水边邨。

泊巨野

冻云寒月递昏明，游子踟躇怯远征。身在畏途亲在梦，魂消飞霰打篷声。  
诗成

云邨病老语多咙，造次诗成杂宋□。还遯开元论风格，拾遗坛上树旌幢。  
闻翁七袞

幽人万遍课参同，只恐劳生事事慵。高枕山房还静听，十千八百五更钟。  
梦储

情锺物化合并难，入梦来时散晓寒。春夜若为经岁永，病魂与尔得盘桓。  
○六言 【附】

诸弟秋试

下邳阻风

诸弟秋试

羣季秋风桂子，病夫夜雨蒲团。黄妳味余隽永，青云望入高寒。

下邳阻风

家近心情如醉，路难风浪拍天。春云过眼无赖，野日蒙头独眠。

○五言排律

云游云岫峰

天只峰晏坐

云游云岫峰

深雪撩狂兴，长□弄晓寒。翠凌孤突兀，玉拱万巉岏。势合疑包地，尘空  
愜凭阑。野情多僻尚，闲处擅奇观。得句浮眉宇，抒思入渺漫。诗魂清到骨  
，仙意欲腾翰。认路樵无迹，题名竹有瘢。余生饶乐事，无地着忧端。

天只峰晏坐

多病连三岁，闲情擅一丘。杖钱疏后计，方药惯前筹。白首纷如叹，青山  
黯尔愁。孤衷危圣主，奇数负通侯。盘涧从真隐，词场谢昔游。扬雄奇异代  
，郑谷许同流。